

# Партийн сургъулин джилин диг

Приозерн района партийн организац партийн просвещенә джилиг төгсәдж, дигинь кев. Эн дигнь—джилин эргид коммунистнр, комсомольцнр болн интеллигенц улс марксистск-ленинск медрлән өбдл-үлхин төлә шунмгъагъар кәдлцхәсинь үзүлджәнә.

Сургъулин давсн джилд районд партийн просвещенә системд 17 кружок бүрдәгдсн, тедн дотр 8 кружок производствин тодрха экономик даслгъар. Кружокст, комсомольск политшколд сурцах болн эврән бийснь, кружокд орлго, марксистск-ленинск теорий даслжах улсин цуг тонь 369 кун болв.

Бүрдәгдсн кружокс цугтан гишнә кәдлмштән таслвр гаргъл уга кәдлцхәв. Одр-бисә политик даслгъна кружокст 7—8-д төрмүд дасгдв. Эдн дотр КПСС-н ЦК-н декабрьск болн февральск пленумсин шиидвр, СССР-н Деед Советин VI-ч сессийин кәдлмшин диг, КПСС-н ЦК-н болн СССР-н Министрмүдин Советин, совхозмудин кәдлчнрүр кесн дуудвр болн нань чигн төрмүд.

Производствин тодрха экономик даслгъна кружокст 131 кун сурв. Совхозмудин экономикин туск төрмүд гүүнәр даслгънд эдн оньган тәвдж сурцхав. СССР-н селәнә эдлахуг өсгәгънд совхозмудин эзджәх чинр, күч-кәлсиг болн терүнә үн-шаньгинь совхозмудт тоолдж диглхин туск, совхозмудин гаргәджах эдтаврин, эдл-ушин үнинь болн тер үниг багърулх хаалгъ болн нань чигн тиим авцта төрмүд кружковцнр дасцхахларн, терүгән эврәнн совхозин бәәдл-джиргъллә, күцә-

гддж йовх кәдлмшлән залгәдж-харгъцулдж кецхәв.

Совхозмудин тодрха экономик даслгъна кружоксин пропагандистнр—үр И. Ф. Курасов „Сарпа“ совхозд, үр И. М. Шилкин, „Заливной“ совхозд, сургъулин кәдлмшиг киндж, бәәрн төрмүдт оньг өгч кәдлцхәсн, дигнь сән болв, кружковцнр медрлән өбдл-үлсн, кәдлмшән сәәнәр кецхәджәнә.

Майин 15 күртл кружоксар дигин занягъс кегдсн, өдр-бисә политик даслгъар күцмдж бәәхинь бас үзүлв. Бүрдәмджтә кевәр, кружковцнриг цугтагъинь цуглулдж, дигин занягъс „Сарпа“ болн „Ергенинск“ совхозмудин партийн организацсар кегдв. Эн парторганизацин сегләтрмүд үр Меркин болн үр Белова, өмнн чигн партийн сургъулин кәдлмшиг сәәнәр гарддж йовцхала.

Сургъулин джилин туршарт дасцхасн төрмүдәр кружковцнрин медрлн сән дундин болдгнь медгдв. Дигин занягъд шунмгъагъар орлцдж, бат медрлтә болцхасан кружковцнр Е. Г. Рубан, Б. М. Снетков, П. В. Зыпунников, Котов, Яхтин, Ланговой болн нань чигн улс үзүлцхәв.

Сургъулин джилин диг келгн кәдлмшт дуту-дунд бәәсиг чигн үзүлв. „Привольн“ совхозин партийн организацд өдр-бисә политик даслгъна хойр кружок бүрдснәс, негн ик эртәр тарв. Учрнә—кружковцнр ирцхәдгән уурихасн йовдл. Бас нег кружокнә февраль сард сургъулән таслв. Эн парторганизацин сегләтр үр Н. А. Хмара—негдгч кружокин, КПСС-н член үр М. С.

Свиридов—хойрдгч кружокин гардврчнрн билә.

Эклцин парторганизацин сегләтр үр Хмара, партийн сургъуль бүрдәлгънд болн гардлгънд оньган багъар өгч йовсар, пропагандистнр улсас кәдлмш некл уга бәәсн учрар, тиим зөв уга йовдл гарв.

Партийн просвещенә бүрдәлгънд сургъулин давсн джилд КПСС-н туудж даслгънд, коммунистнр улс эврән бийснь, кружокд орлго теорий даслгънд, нег үлү марксистск философий гүүддж даслгъ кехд, мана оньг багъар тусдж йовб. Тиигәд цуг района партийн организацар зуг 21 коммунистнр партийн туудж болн философий дасцхадж бәәв. Иим эндү йовдлг сургъулин шин джилд чиклх зөвтәвдн.

Дигин занягъ келгн революционн теорий дасцхадж йовх улсин медрлн өбдлдж, батрдж, энүнәс иштә тедн партин болн правительствин шиидврмүд күцәхин төлә ноолдлгънд шунмгъагъар орлцдж йовхинь медүлдж үзүлв.

Сургъулин джил төгсцәр, цаарандан медрлән өбдлүлгъиг зогсахмн биш гидж кружковцнр келцхәв. Эн учрар зунин туршарт лекцс, докладс умилгъна кәдлмшиг чаньгъах кегр ода күцәджәнәвдн, газет умшлгъ болн күүндвр кедж политическ төрдүд цәәлгәддж өглгъиг делгрүлүвдн.

Кружковцнрин дигин занягъд деер заасн тоотиг сургъулин шин джилд белдлгъ келгъндән тоолдж авхвдн.

**Б. БАМБАЕВ,**

КПСС-н Приозерн райкомин пропагандин болн агитацин отделин заведующин дарук.